

光緒山西通志

孝友錄三

錄四之三

山西通志第一百四十

賜進士出身頭品頂戴兵部侍郎兼都察院右副都御史巡撫山西提督軍務臣張煦奉

旨監修

國朝

蒲潞汾澤大  
朔甯七府

崔志哲蒲州人順治己丑之變賊遣偽吏至蒲責餉縛其姪去志哲聞之卽詣吏曰家雖析居餉宜問我孺子何知遂解姪索自繫會

大兵至得免

劉養德臨晉人家貧爲人傭而奉母甘旨不少缺歲凶躬負母走豫道遇賊揮刀及其母養德以身護母曰甯殺我無殺我母賊以刀指養德母曰子死我奚能獨生幸憐之賊不聽舉刀刀倏折爲二乃相顧錯愕曰此孝子也殺之天且不我

佑遂委之去母子獲全

李世昌臨晉諸生隨父避亂爲賊所擄將殺其父世昌叩頭出血請以身代死賊憐其孝並釋之

陳適孺猗氏人閩寇過縣勒宦裔輸餉逮其父湛念適孺毅然曰父年邁讀書不治家產事當問我遂代父往慘被夾比終不色沮

王國正猗氏人幼喪父家貧甚不能娶妻子身奉母明季盜起負母避山谷遇掠盜礪刃將殺其母國正呼曰甯殺吾勿傷吾母不然吾母子偕死耳涕泗沆瀾悲不自勝盜胥釋之并告避兵地母沒廬墓三年直指吳題旌孝子

張志奇猗氏人順治己丑姜壤之變父東升母潘久病臥牀伯父母亦老難行志奇以次背負出城輓車避焉後繼逝終

歲傭工力舉四喪人多義之

陳毓秀字含甫猗氏人父國泰諸生以孝友稱秀善事繼母荒歲施金粟全活無算不給則以牛羊田地濟之由歲貢任平魯訓導子基命帶經力田叔姪兄弟三世同居無間言自國泰至基命俱有孝行祀鄉賢孫綸綽皆成進士

孫希升榮河人幼孤貧母賀氏撫之長力作養母遭寇亂負母潛逃棄妻子不顧母卒廬墓三年嘗拾金還人掩骨埋齒好善不倦士民公舉旌表

李斗星字拱北蒲州人少讀內則曲禮諸書卽能以禮事親然家故貧不能素具甘脆自傷爲子無狀時泣下旣補諸生乃授徒資脩脯以養其教人必以孝弟爲先從遊者咸飭門內行焉後父母沒廬於墓先後凡六年

薛英賢蒲州人鬻煙紙於市夜輒苦讀父病痿日減食積錢醫治以孝行旌

溫錫明蒲州貢生親沒負土成墳廬於墓側有野蠶成繭之祥又張聖謨亦貢生父圻嘗以孝爲州守所旌聖謨尤至性過人克盡色養以縣丞注選未仕卒

衛大訓臨晉人父有五子嘗嘆曰子多母饑信然哉大訓聞之感泣竭力侍養父卒事母出告反面如父在時母愛諸孫分甘旨徧給之大訓誠子姪令固辭母嘗語鄰媼吾諸孫皆喜食糠覈吾殊不解撫弟妹婚嫁胥如禮遠近皆稱孝子劉煥臨晉人家貧未娶執爨以養瞽母出告反面風雨如期必歸母老病負之而行垂三十餘年

韓啟芳臨晉人性至孝鬻子葬父終三年不入內室母病危

禱於扁鵲祠長跪七晝夜血流滿地夢神賜藥而愈比沒廬墓三年嘗行雪夜有狼導之近瑩遂沒瑩中生有異草高至八尺餘春花冬萎至終制乃已

楊常謙臨晉諸生父病痺臥牀十六年常謙侍飲食滌溲穢夜未嘗就私室父沒後時時念及涕泣不禁又荆明性謝詵並善侍父疾孝名同播

張朝紀猗氏人年十八母病垂危夢神語曰臂肉可愈也如夢行之病遂瘳

令狐永觀猗氏進士客京邸聞父病旬日馳歸盡瘁奉侍父卒瘠毀旋遭母喪勉襄葬事而沒生有雅量僕嘗遺失幣物數十金慰而遣之家居見盜蔬禾者亟避去惟恐其抱慚云杜忠猗氏人椎魯有至性嘗因父病往禱解州關廟膝行泥

淖中往返百里一步一稽顙露宿塗中歷五年不少懈又嘗爲母禱叢祠冒雪膝行至則廟門自開人咸異之

陸紹祖猗氏諸生父喪哀毀盡禮廬墓側朝夕號慕母卒亦如之兄弟析產讓肥取瘠子運禧俱成進士

衛養春猗氏人力耕以佐弟讀事父母先意承志生養死葬備竭其誠居鄉以厚德稱卒年八十五曾孫士樞方髫年卽識爲偉器後成進士官縣令

陸鈞猗氏人父麟定病癱侍側五年不入私室積勞成疾遂不起以未克終養呼負負而卒

賈允重萬泉諸生母早沒後母虐遇之允重不少憚勞每爲人言母愛已奈不能事母何泣下久之後母亦感其孝待之轉慈門內無間言父母繼沒廬墓三年未嘗見齒康熙中旌

高丕茂萬泉貢生事親以孝聞父卒哀毀盡禮母老而失明先意承志母雖盲殊不自苦也雍正元年旌

李楫萬泉貢生以廬墓稱孝建坊旌表同縣馮錫祉侍親疾七年不懈孫德仁辛丑歲饑鬻子奉母並以孝聞

趙廷璽榮河廩生甘貧力學有介操事癰兄五十年如一日潘衍渭榮河諸生父亡事繼母繼祖母以孝聞族叔某幼孤迎其母子同居教養惟謹母與祖母對人言時稱其孝云孫天慶榮河人年十七割股愈母疾邑令表其名於旌善亭又樊鶴算亦嘗割股療親

潘源湛榮河諸生事親色養備至父疾一晝夜行三百里求醫治之父有養子目雙瞽侍之無情容

丁夢輔榮河人事親竭誠盡禮妻李氏侍姑疾亦以孝稱云



王盛永濟人力農起家與兄興式好情篤兄有子三盛以兄  
食指日繁也產平分且不給乃請於兄祈以一字嗣已兄感  
其誠許之時誠子姪曰爾輩同居固善如分析則田產四均  
之違者必遭天譴卒後子姪如其教聞者嗟異

樊作知虞鄉人繼母董病痿作知編竹若坐具繫諸身時負  
母出遊以娛其意人有種瓜者蔓至樊田瓜熟告其人使取  
之曰瓜有根如人之有本不可忘也

胡拱微虞鄉人幼喪母旣葬日泣於墓值山潦漲發將及墓  
臥守不走避水亦竟止父瘍作於股親吮之尋愈

王大河虞鄉人力傭以養父母羣從遠出不歸伯叔父母皆  
失依並迎養之父沒事母益謹及卒盡鬻其所有以襄葬事  
至無廬以居

王應昇虞鄉人兄弟五人食必同案後以口衆分爨鬱鬱不樂復合居書忍字以共勉又申雲霞亦以孝友稱張學詠善侍父疾邑令旌之

薛毅永濟人母喪哀毀哭泣三年不出戶雍正初當事將以孝行舉力辭之尋由丁未進士授蠡縣令

王鯤永濟人父賈於外鯤方學念父久缺定省乃令弟煜專力於讀而從父習營運以分勞苦父沒以母老罷賈承歡侍側備極色養及卒廬墓三年又姬致祥亦賈人子母沒廬墓終制不歸親友勸慰勉從之抵家悲不自止旋成疾卒又任天河亦以廬墓稱孝

李來來永濟人母病篤祝於天割左臂肉烹以進病良已

高生蓮永濟人幼喪父母王亦早逝嫡母謝鞠之長事母極

孝母病憂懼哭泣致目失明及病愈喜極目復明如故人以爲孝感云

牛映極永濟廩生事繼母以孝稱於異母弟教養備至遇事曲全惟恐傷父母心也父沒廬墓

張廣浹永濟諸生幼孤事母得歡心母感風痺晝夜侍側進飲食滌浹穢悉躬親之十年不懈母卒躃踴號泣年已七十矣猶哀如孺子焉胡體道以諸生議敘待詔亦善養親

王文高永濟人家赤貧傭工事母母目瞽搔抑盥濯皆身親之出傭或遠必告母以某日歸託鄰姬代勞涕泣而去至期雖風雨必歸母沒哀痛幾絕以貧不能娶竟無嗣年逾八十卒鄉里義而葬之

李子發永濟人素以孝著父遭疾醫藥罔效聞古人有以糞

甘苦卜病之休咎者嘗糞至三次時年已及五十矣

廉廷臣永濟人父沒廬於墓側負土成墳

甯宗愚永濟人幼喪母父凡四娶皆事之惟謹撫弟妹有恩常聚奎少育於祖母事之得歡心奉繼母三亦以孝聞

王永奇臨晉人父賈西域十餘年無耗永奇旣冠立意遠尋臨行瀝血禱於神誓不得父不返也隻身西去未十日父子相遇於塗聞者異之父沒母病痿侍側衣不解帶者八年李文炳臨晉人家甚貧訓蒙以養父丁戊大祲無可餬口乃傭力於富室妻子俱餓死而父未嘗不飽繼而父病思食雞卵災年無蓄雞者村有大樹鴉鵲聚巢試探之得卵百餘枚懷歸供父卵盡而其父始沒

林多敏臨晉人母病痺造小車挽之遊以娛母意母齒落嗜

瓜每年種瓜數畝構園焦輦母其中進瓜爲壽奉養十餘年  
族黨稱孝

鍾士林臨晉諸生父疾臥牀凡所需必親爲營辦夜不解帶  
者數年一日以事出外妻李代取溺器掩鼻作避臭狀士林  
歸見而奪之欲出其妻父止之未果由是終身不入妻室  
李棲鵬臨晉人母李氏失明棲鵬買於外每夕必歸舌舐母  
目以百爲度咽而不吐期年母目復明人稱爲舐目孝子  
荆鍾靈臨晉人事祖母極孝監生吳恒仁及楊生蓮皆不爲  
繼母所容孝事愈謹母化爲慈又張懷庚母亡廬墓趙志哲  
姚追麟並善養親以孝友聞

令狐振揚猗氏人幼失怙事嫡母色養兼至母沒哀毀幾殞  
後以孝旌居恒瞻族恤鄰時稱碩德子鐸由廩貢官訓導

岳毓桐猗氏人事繼母孝母病額神祈代病愈朔望必焚香  
爲母祈壽母年八十四卒王仁育儒家子事繼母吳如所生  
兩弟並吳出也仁育廢讀治生俾弟專力於學以孝友聞  
岐愛順猗氏人母呂氏病痿朝夕侍奉五年如一日妻不得  
母心出之遠近稱孝無閒言

楊奉時榮河人繼母荆臥病廿餘年與妻侍養無怠兄已分  
居卒後妻孀子幼迎歸合炊又承父志以所積貲分給羣從  
曰是皆吾先人所撫而長也鄉里並高其誼乾隆中旌  
茹而馥榮河人幼孤事孀母得歡心年未壯喪妻以有子女  
誓不再娶凡母縫紉養殮皆身任其勞終身孺慕

母廷相榮河廩貢年十四執父喪極哀毀有叔久析居感其  
孝復同爨廷相謹事之居鄉尤多行誼

盧振遠榮河人母病劇思肉割左股以進病尋愈

張煒榮河監生父病痔延醫不效煒焚香默祝曰苟可以療父病雖刳身肉不敢辭夢中恍惚有告以口吮卽瘳者父難之煒固請乃許果立愈人謂至誠所感云

張天爵榮河貢生幼侍親疾足不踰閭父病篤枕其股於臥榻者月餘及居喪柴毀哀號因未卜吉壤寢食柩側三年如一日監生張華國亦善侍父疾嘗建宗祠設社學鄉黨稱之尋金材榮河人少孤家赤貧母聶別醮依姊以居不爲其家所容責令拾薪一日大雪無所得懼不敢歸奔父墓哭泣竟夜有賈客過而憐之攜以入秦營販十餘年薄有積貲歸而授室時母聶貧老失依目雙瞽迎歸奉養夫婦委曲承歡母年九十八乃終敬父墓合葬焉有兄久傭於外一日攜妻子

歸金材喜乃以田產授兄而復賈於秦不數年兄盡耗其產亦無怨言人尤難之子步月由進士官至監司

姜大榮河耆民也家教肅睦五世同居邑人賢之

潘冲霄榮河諸生母亡父繼娶郭氏少冲霄數十歲事之惟謹終身無失禮以孝行旌同縣貢生衛繩武監生李燦武自修孝廉方正潘克升及王興仁並事繼母以孝聞

王志璋榮河人主事炳奎子也侍父讀於京師母遭危疾潛割左臂和藥以進母尋愈旋歸應試念母弗置體素羸疾作卒於家年甫冠也光緒中旌

張金書榮河歲貢官靈邱訓導王建功廩貢並以孝友著監生張興祖王豐茂及閻競秀皆善養其親諸生潘體仁舉人李光斗武舉潘兆瑞縣民蔡成芳薛玉珊蔡八元並以友愛



兄弟爲鄉里所欽

以上蒲州府

原良長治人順治己丑姜逆之變母秦爲賊所執欲犯之奮挺相擊賊怒割其脣良罵愈厲母子皆遇害

王運隆長治貢生姜逆之變同弟運興奉母朱避兵天橋寨兵攻寨急母曰我死則不辱矣遂自縊兄弟號泣並投崖死林茂楠長治人遇變負母避亂跣行四十里遇賊驚散痛哭行求得母於保定得父於西安復走壺關得少弟方亂時有少婦願作配者力卻之

賈守節長治人己丑之變負母他徙猝遇賊斫以刀傷齒猶負痛疾走賊追及又射之乃與母俱仆旋有憐其孝者縱之去竟免於難賊平求妻子皆得之時稱孝感

馮文星長治人石門知縣詔之子逆聞之變考掠搢紳繫詔

於獄文星號泣請以身代詔得免而文星屢受酷刑始得釋歸事定甘貧讀書學使者旌其行

范韓長子人己丑之變父鵬程母李氏俱與難韓與兩弟被掠乘間逃歸變產贖弟屢蹈白刃卒得完聚後由舉人官臨汾教諭念及二親悲泣欲絕云

賈董似長子人己丑之變其父傷足亟命之去董似不肯力負父抵西山石穴中厯七晝夜糧盡拾小乾棗敲河冰奉父父分啖之則曰有探懷視乃石子也後舉順天鄉試仕至玉林衛教授

賈待旌襄垣諸生閹寇之變父元梓以索餉被執待旌挺身代父受刑自辰至申死而復甦父養疾壽聖寺侍湯藥三月未嘗一出寺門學使桂以純孝旌焉後由貢官信陽知州

新魯屯留人家甚寒奉親必以甘旨父母性嚴每有責輒歡  
顏受之父病篤涕泣視天願以身代嘗糞甘苦以卜安危學  
道以孝行優賞三次順治中由貢生官鞏昌府教授

韓之珣黎城人嘗奉父避寇於董北寨寇突至威劫之珣抱  
父痛哭寇感其孝竟散去著有韓氏家訓以歲貢終

陳度潞城人父復親官廬陵典史遇難殉節度年方十二聞  
之號痛幾絕攜僕往尋至太行僕負資逃去度乃沿途乞食  
南至偃師有程某哀其志收養之欲妻以女度堅不從逸去  
至樊口遇長治人李長庚於市助以資得達廬陵日夜號泣  
感動行路告以棺處乃扶歸後以歲貢任嵐縣訓導

平萬心壺關恩貢居家孝友研究經籍士多從遊選訓導因  
親老不赴又拔貢馬萬里亦以孝友著後官內鄉知縣

李禮門長治人七歲失母號泣不食者三日父天培鰥居三十載雖一飯一寢禮門未嘗不在左右也比沒哀毀骨立廬墓三年刊有勸孝歌以勸世

程鈞長治人父堂客死粵東鈞方七歲日夜號泣家貧傭工於人積貲以歸其柩比母喪又以無力安厝憂瘁百端傭工河南而殞世共傷之

馬任佶長治人康熙戊寅拔貢事孀母以孝聞

劉法唐長治人幼失恃不期年復失怙事繼母連氏至孝連亦撫之甚慈法唐登第選侍衛充正紅旗漢軍教習固請終養旋里遂杜門不出百計承歡連至七十以壽終

萬世忠長治人寄居潞城幼業儒父臥病藥必親嘗父沒既葬築室於墳終日哭泣長跪墓前背誦孝經一過雖值風雨

寒雪不輟忽有犬至與之爲伴久之不去人以爲孝感後母  
亡亦然妻死不續娶有田數畝躬耕爲食訓蒙以終云

李顯文長治人父早喪母患瘍日侍左右歷五年不少懈性  
好施予善行甚多年六十始生子壽九十卒孫已十齡矣

王阜成長治人遊學京師忽念父有宿疾恐復發單騎一晝  
夜行六百里而歸父果疾喜子至良愈人稱孝感父母繼沒  
廬墓五年康熙甲申歲大饑焚逋券四千餘金族鄰貧乏者  
咸待以舉火每歲隆冬施衣設粥至老無間

崔兆祥長子諸生諸城令自晉養子也自晉被論病卒家屬  
坐流徙時自晉子兆瑞年幼兆祥涕泣請代往格於例不果  
行遇赦攜兆瑞歸復徒步走諸城迎自晉櫬返葬

裴日章長子諸生父沒日夜號泣喪葬不遺餘力母年八十

耳目皆廢左右扶掖依依孺慕妻吳亦能相夫事姑

范文長子廩生母喪哀毀盡禮父鵬升暮年失偶左右侍臥不入私寢者數年父豪飲時邀父執供杯罍以博其歡文先父卒以不獲終養大痛妻秦氏及子亦能繼其志

崔良長子諸生母程亡弟峙完並幼父宗義再娶于陳生弟亭父卒良事繼母撫三弟並至成立創業均產時以爲難又監生范琬亦以孝友爲邑令所旌

馬遠長子諸生舌耕供父父好飲常夜醉於外遠每伺人門左俟其出扶掖以歸終身無倦色又王百祥事父亦善養志以貢官至平陽教授

康侯長子諸生父病痿而母范氏亦染沈疴侯年十四日乞鄰媼乳奉之聞高平有名醫徑往求之昏夜歷羊腸虎穴不

懼也居鄉尤多行義上官屢匾旌之

馮根孩長子人隨父樵於山虎突至銜其父急以斧劈虎頭虎怒爪其頰血肉淋漓卒舍其父負以歸父子竟無恙

冀卿長子廩生嘗試太原聞父病不終場歸雍正中舉賢良方正以親老不就歲饑出粟振貸里民投券者五百餘紙悉焚之不責償學行爲一時所推

李豫章長子人父嘉旺好施嘗積粟百餘石值歲祲體父志盡散之父卒居喪盡禮事母秦亦以孝聞

馮爵長子人由進士授懷集令在官清慎民愛戴之間兄死卽日告歸養母二十年人稱純孝

楊惇長子歲貢性至孝中年失偶以親亡不逮養終身不娶又歲貢范履泰事繼母得歡心奉叔如父敬姊愛弟並竭其

誠世推其有文正家風

趙蘭馨長子廩生楊濟楊暕俱諸生事母並以孝聞吏員鮑義及縣民李昌榮王大有並善事親劉璵劉珏李鳳翥范學徵孔昭綰並以孝友爲宗黨所稱劉庚珏子也亦有至行霍芝屯留諸生因母路氏病遂精研醫理侍藥廿年痼疾以除父昱染風痺臥牀歷三寒暑多方療治亦痊及居喪年已邁猶哀毀骨立知縣梁嘗旌之同縣馮卜世亦諸生侍疾居喪並著孝聲

賈燾襄垣諸生事母孝外祖無嗣躬祭掃三十年年七旬隆冬居喪赤足百日動合古禮又李挺生母疾躬親湯藥終身不敢假手於人父卒哀毀骨立遂大病明年春強掃墓痛哭仆地扶起吐血而卒



郭士英襄垣廩生父病祈藥於潞城起雲臺一晝夜往返二百餘里及居喪哀毀而殯時稱爲孝

孟玠襄垣人幼孤事祖母盡禮母年老玠常侍寢不入妻室撫弟四人恩誼周至邑人咸稱孝友又武生馬士驥劉澎並以孝友著劉漳諸生食餽善事其親有古幾諫風

曹林襄垣人父病跛林傭工供養與妻武氏俱以孝稱

李占黃字杏苑黎城人少喪父奉母孝謹而性特豪邁以選貢授天台知縣蒞任三年告歸以養母母卒終身孺慕偶觸輒泣然流涕撫弟四人胥克有立置義田贍族歲饑施粥給種率不責償當任天台時友張天斗傳母訓曰甯可得罪上官不可得罪百姓占黃恪守論者謂爲廉孝

韓日宣黎城人之埶子也事親孝母沒父再娶奉之不異所

生以諸生貢太學年及艾矣居喪以哀毀卒妻郭氏亦有婦儀後以夫婦雙孝舉建坊旌表

武祖文潞城人少孤事母至孝母病痿臥不能起者十餘年奉侍不少懈兩兄早逝撫其孤皆列庠序里人欽之

吳名都字輔三壺關諸生事繼母平氏得歡心晝耕夜讀力供甘旨妻亡不再娶母沒哀毀葬畢旋卒又縣人雷震虔家赤貧傭工以奉孀母服勤三十餘年母卒號泣三日而死

王三聘平順人父病百方醫之罔效憂甚一日夢中聞人語曰爾父病必獲虎肉食之始克愈醒而泣然曰吾安得虎肉意其爲股肉乎吾誠割股庸知不效於虎肉遂割股以進父果立愈事聞道府躬詣門給匾以旌

王繼業平順人由吏員授江南夾溝驛驛丞性至孝年踰八

十猶思親不置每逢令節輒詣墓號泣一日哭仆地急救得甦嘔血而卒

宋顯異長治附貢父病廢扶掖惟謹飲食起居必躬親之病革恐傷祖母心暗中擗踊母卒廬墓三年嘗設義塾又嘗焚券讓產乾隆中建坊旌表

張視學長治人乾隆丁酉拔貢事繼母以孝稱又馮潤身亦善事繼母

李巧兒長治乞人也每乞得食持以奉母母食畢然後食或無餘則忍饑再乞母未飽終不食也

李增經長治人與弟增綸相依爲命家赤貧汲水甕之出入必俱爲人傭亦刻不忍離增綸卒增經思之成疾亦卒

靳學玉侯安國並長治人侍親居喪均克盡禮刑璽以廬墓

爲縣令所旌監生靳立柱學玉子也母喪至哀感終身

田希聖長治人十歲喪父母馬氏病廢展轉牀褥每手潔其穢母亡待弟恩義周至以商起家喜施予縣令匾旌其門  
璩折桂長治武生修飭有士風親卒毀甚旣葬移居宗祠每食必祭歷三年矣一日出詣墓痛哭踰時遂不歸家人無如何爲之起廬廬成獨處如在祠中也尋感疾昇歸卒

靳宜春長治諸生歷事繼母三人能得歡心人無間言父疾躬侍寢食不解帶者兩年餘學使朱按潞採輿論檄縣庠以孝子舉又諸生牛躍麟亦以孝行爲學使所旌又縣人牛仲達奉母孝居鄉多義行陳誥郝甸岐並以孝友矜式鄉里  
范述滂長子廩生與監生和學厲事瞽母並稱篤孝諸生秦奚黃勵縣人郭珩皆善養志趙起蛟裴起鳳溫如璧亦善侍

疾又諸生楊大猷監生裴逢春均孝事祖母歲貢趙忻監生  
何裴炳諸生劉異勳武生賈德及侯廷賢趙永烈鮑溫皆克  
敦孝友其以友愛著者有監生賈世輔陳虞季耆民張克讓  
馬全節鹿化成楊晉李拂雲諸人

任仁屯留歲貢母卒廬墓讀禮生徒多就廬問業焉三年乃  
歸

馮盛世屯留諸生父疾赴郡延醫歸渡漳暴漲衝沒居人救  
之獲甦因具酒壓驚泣曰吾父病危何心杯杓乎抵家父病  
尋愈人稱孝感父母繼歿建祠朝夕祭奠孺慕終身又監生  
陳觀光事親能先意承志乾隆中以母命修理學宮縣人立  
碑以志李棠爲諸生有聲學使蔣嘉其孝行屢獎之

黃運香襄垣人父母早逝事祖母李克盡孝養世母楊臥病

三年偕妻奉之終身又劉美中與妻韓事繼祖母並以孝聞許坦襄垣人事嗣父如所生父以股疾艱於行垣負以出入左右不離及卒痛毀幾絕以孝行旌表建坊李德培乾隆甲午舉人亦以孝事孀母獲旌

李本植黎城人幼孤庶祖母及繼母撫之長本植事之並得歡心歷四十年如一日庶祖母卒爲服喪三年母喪將畢猶日省墓所弟本固病狂爲延醫調養二十年未嘗少拂其意次弟本立亦早卒撫其遺孤並列庠序黎人咸稱盛德云韓煜黎城人孝子曰宣子也日宣居喪致疾煜日夕籲天祈代母郭多疾侍湯藥滌廁踰者十八年無倦色比卒廬墓三年人稱世孝以拔貢授靈石教諭年七十八卒

武振撫潞城人童時父病不起雪夜赴長子延醫履失雪中

赤足行四十里比歸兩足並裂中年喪妻以有子遂不再娶兄弟析產讓豐取約時有屠牛者牛忽脫縛逕奔振撫處卽倍價贖之其他善行類此

申所守段文正並潞城人以純孝稱劉文奎平順諸生積學工文居親喪哀毀幾殆與兄弟友愛無間遠近推其文行陳伏和壺關人節婦趙氏子二歲而孤事母孝謹家小康而好施給雍正初大饑傾囷倒廩以救鄉黨全活者數十家王金湯壺關人父失足落塹金湯急救父投塹下遂俱死其妻苗氏世家女痛翁與夫亦乘夜投塹死

秦學珍壺關人四歲喪母哀感如成人嘗隨父過橋父失足墮水號泣搶救亦卽投水漂流數里父子俱攀隄上時年甫十三也人咸以爲孝感所致事繼母甚謹母常鞭撻之惟自

引咎無怨色母死負土成墳以服賈起家嘗修書院建橋梁  
出粟賑饑善行甚多乾隆中以孝義旌又王鳳翽廩生善居  
父喪事繼母以孝聞

馮世全壺關人少時父墜崖死世全號泣亦奮身下從竟無  
恙晚年舉子五年八十五乃卒

朱留根長治人幼喪父母疾年甫成童躬侍寢食垂五十年  
不懈母卒毀瘠骨立嘗汲水井上意有所觸一慟幾絕終以  
哀思致疾卒

王文輝長治人父母早沒事兄敬服飾器具兄未用未嘗敢  
先也自壯至老愛不少弛子芝太學生羣從兄弟同爨者七  
十年無間言

王義朋長治人嘉慶間舉孝子邑令匾其廬



暴聚星長治諸生父病祕結恒手自除之父沒侍母疾情益迫切百計求醫卒不起粵逆之變所居郝村當兵衝率妻閉戶守母柩誓死不去竟無恙

李如芝長治諸生幼喪母祖母鞠之長事之甚謹奉繼母尤得歡心母生子蘭陵嬰羸疾多方醫治病劇則市妻妝匭物爲作善舉意可邀福也後死撫其遺孤恩踰已生

郝玉堂長治人少貧隨客營運四方念母卽歸晨夕侍奉備極色養丁丑歲荐饑百計爲母營甘旨而自與妻子炊糠粃雜樹葉食之不令母知也母年踰九十乃卒

何其遜長治人議敘九品父母相繼逝柴毀幾至滅性啜粥飲水者蓋五六年又王元德母卒日夜號泣年已五十二矣竟以毀卒

翼和長治人幼孤兄秉彝鞠之長補諸生以優行貢太學試於都未歸而兄卒和痛悼爲服心喪三年後官大同訓導作斷雁哀秋圖以志感一時題詠甚衆

趙成玉長治人家貧父賈於外母喪明供奉飲食出入扶持未嘗少離母沒哀慟不欲生見者感泣繼母王性卡急下氣怡色勞而不怨每盛怒輒長跪引咎王感其誠爲霽顏時對人賢之一門雍睦家亦漸裕人稱孝德云

歲貢原維清增貢董萬青優貢章聯章並長治人公舉孝子監生李潤章李炯與李滋亮並以孝行獲旌又廩生劉銘與從弟劉銓議敘九品宋均監生崔天喜縣人李均史永禎牛黑則原天增崔懷仁董金貴景春榮皆善事其親侍疾居喪見稱鄉里貢生郭鎮都諸生梁體元監生朱堅及靳永康李

芝瑞謝紹樂事繼母並有孝聲貢生李毓璋奎文閣典籍史永康及馬世興皆事兄克敬友誼可風

王應麟長子拔貢遭繼母之變卒委曲將順以致雍睦

溫小三長子人傭工事母曲盡色養時人並呼爲孝三云

李沂長子諸生繼母何耄年多疾侍養無怠母沒廬墓三年李鍾長子舉人任襄陵教諭篤於孝友舉人郭藩亦竭力事親冀修仁者推產讓弟並爲鄉黨所欽

吳文耀屯留諸生自幼出嗣叔父父沒母待之嚴事之彌謹遇怒則長跪請罪俟母悅乃敢起母疾侍奉湯藥跣步不離徐應鵬家貧力農父臥疾五年侍養不怠又武時中監生力田奉母孝養無缺朱顯異亦以孝養爲里人所欽

王丙寅屯留諸生幼孤事兄極謹親愛備至及兄沒終日涕

泣每獨居若聞兄呼喚之聲出視之乃知兄已亡如是者數  
年後思之成疾諸藥無效一夕夢兄語以當服某方服之果  
愈又貢生馮照十四喪父與其三兄同食共榻惟命是從終  
身無間亦爲里黨所稱

趙光彥許永和並襄垣人事親先意承志孝感繼母得其歡  
心

劉滿海襄垣人家赤貧傭工以事其親克盡子職母沒事繼  
母委曲得歡心鄉人稱之同縣米福亦家貧克孝又李士達  
事親以禮始終必誠

孫子壯襄垣人父逋負數千金令諸子析居債隨產分子壯  
慨然曰親老弟幼何敢異視願獨任其事後卒償父債友愛  
諸弟始終無間

王暄襄垣諸生父沒哀毀骨立孺慕終身父嘗欲建文昌樓於村南不果暄力經營以繼其志家奉木主每事必告久之若有見聞人驚爲異又諸生韓安慶幼失怙恃事嫡母趙盡孝母沒立祠出告反面無異生時

申五美潞城農家子也性至孝嘉慶中歲歉五美已娶婦母老矣度力不能全遂鬻其婦以養母

申列垣潞城人母趙嬰痼疾醫皆束手乃取岐黃書潛心參究久之術遂精以醫母疾良已村居嘗病歲時賽社歛錢爲貧民累乃割腴田數十畝施村祠中爲經費里人稱之

李九則潞城人少孤事母至孝家雖窶而每食必具甘旨一夕母感微疾欲早眠語其婦毋久侍反闔室扉而去九則歸見之大怒婦以母命告愈怒曰烏有母疾而婦不侍寢者乎

至施鞭扑母爲慰解乃已其性眞類如此

劉安郭峻並潞城人以孝友著聞鄉里李流芳善居親喪張汝釗賈師琮並孝事繼母郭承志峻子也亦能以友愛稱

楊啟關壺關人少失恃事繼母王曲得歡心年逾六十猶爲孺子慕見者不知爲繼母也貧爲戚某司筦錦寸絲粒粟無所假借遠近呼曰楊孝子又諸生李燮元及侯如恒並事繼母以孝聞

閻中鶴壺關諸生侍母病色養兼盡每於外聞一事見一景必入告以博歡笑二十年如一日母卒竭力營葬哀痛泣血不數日亦卒里人咸爲垂涕

韓永德壺關人幼孤事母甚孝貧服買城中去家數里每夕必歸省風雨無阻時或值母寢必從窗外告復乃退母卒哀

毀骨立幾不勝喪又許占寬農家子亦以孝聞

來鳳鳴壺關人父母繼逝毀瘠踰禮營葬既畢疾遂不起時以死孝稱焉

王景川壺關人隸平順鄉學同治癸酉選貢內行純摯授徒得資分給昆弟與同懷五人友愛備至終其身無芥嫌年未四十遽卒時論惜之

以上潞安府

孟之俊介休廩生身感重病順治六年

大兵討姜瓖餘黨軍於辛武堡前其弟誤放礮火撻罪至死之俊力疾起曰吾久爲棄人弟在猶可承業理家請身代之遂寬法薄笞舁歸飲食如舊病亦旋愈

張芑介休人甫二歲父客遠方遇亂母子零丁比長遠尋吳越負父柩以歸事母孝敬備至母喪哀毀骨立築室墓傍飲

食必奠人皆稱之

楊梁孝義人母病屢藥不效焚香哀禱剉股和藥以進母尋愈邑令表其門又任國衮年十六亦以父疾剉股爲知縣陳之文所旌

張登楷孝義人家故貧幼時父問智謀食他鄉十數年無音耗登楷旣長力作成家有子矣一旦訣家人誓尋父崎嶇經年與父遇於川西父已繼妻生子無歸意登楷度不能強乃返貸於鄰族盛飾輿馬迎父而歸色養備至以已所置產與弟均分孝友之稱人無間言

李天祐臨縣人性純孝母病劇醫藥罔效禱於神夢有語以當請某醫者旦出遇之途泣告以故曰疾可治也藥引良難詢之以人肉對天祐毅然引力割臂肉一臠和藥以進母病



尋愈時順治九年也縣令朱上其事獲旌

魏之憲汾陽貢生事母三十餘年曲盡孝敬母病禱神求代  
比沒哀毀盡禮觀者泣下康熙中旌又諸生劉漢裔母喪廬  
墓以孝子舉

呂曰唯汾陽人家貧訓蒙自給事親甘旨不闕鄉里目爲孝  
子祖母老疾竭誠就養不藥而愈人尤稱之又有曹得英胡  
侃並以孝稱

王尙龍平遙人由恩貢仕至陝州知州事父文俊母白氏先  
意承志曲得歡心父疾嘗糞以下吉凶逆闖之亂追搢紳索  
餉屢受箠楚恐傷親心戒家人無令知後其父壽百歲母九  
十二歲人以爲純孝之報云

王欲見平遙諸生事親備極色養居憂哀毀盡禮括髮茹素

三年如一日居恒讀書守道不欺暗室康熙中以孝行被旌張國堯介休人幼事祖父以孝聞兄弟七人同居立家規十六則家人千指奉命唯謹寇至率衆禦侮復捐金築堡鄉人賴之後由優貢官黎城訓導

靳士龍介休人父世愛順治二年偕里人高汝才入山樵採以小忿爲汝才毆死母任氏方娠隱忍未發已而生士龍旣長爲言父死狀士龍嚙指誓必報以母在遲遲母卒旣葬遂持挺出要汝才於路擊殺之詣縣自首閭黨咸欲訟其事上龍曰死吾分也何喋喋爲卒死於獄邑人莫不哀之

出

武得元介休人母老病以負販所入奉湯藥旣而病益危醫者謂得人指可療卽斷一指然灰進之病尋愈知縣李壽彭旌其門

喬貴章介休附貢母年八十病醫博求良方醫治復親舐之  
三年雙眸復明母壽至九十三

王烈介休人事繼母以孝聞弟然繼母出也友愛無間先是  
烈母李氏以匱資別置產父遺命析產時歸烈書一紙付之  
烈終身不言亦不析爨比將死出父書示子姪取火焚之  
宋君錫介休監生少孤事母曲得歡心季父沒撫其孤共食  
息者四十餘年

宋如隱介休人以州同注選幼孤事母盡孝有愛妾偶忤母  
意卽出之母病侍湯藥衣不解帶比沒廬墓三年竟以毀卒  
李異香孝義諸生嘗刲股以愈父疾知縣張瑋匾旌之

馬生彪梁椿並孝義人俱以推產讓弟爲鄉里所欽生彪子  
奇功亦有行誼

周琦孝義人康熙癸酉舉於鄉事親甚孝乙未循次選授  
縣以父年老艱於迎養改就教職

王猛孝義人髫年失恃力學爲諸生食餼訓兩弟輅冕俱登  
鄉榜又監生師應笏生二歲而孤事兄如父子瑞龍山舉人  
官開縣令

楊聯芳宿鄉諸生天性純孝值凶荒兄弟轉貸保全而奉親  
甘旨無闕侍父疾鬻產供醫寢食俱廢母疾亦然旣沒廬墓  
三年撫兄遺孤一如已出知縣張韜匾旌其門

劉有德甯鄉人同弟有才傭工以養瞽母得餅餌則懷以歸  
或忍饑竟日終不自食雖凶歲不缺於供知縣呂履恒給錢  
米周之

呂審廉汾陽人雍正己酉舉於鄉父文樞在官以事逮獄審

廉時居家聞之六日至京師晝夜徬徨謀所以救父者兩閱月竟感疾口中連呼辨寃而絕目不瞑時事已得解父哭慰之卽瞑海甯陳相國爲作呂孝子傳

李煥汾陽人與兄燧相友愛雍正中兄貿易中州以事牽連遭戍煥聞倉皇變已產赴京輸餽贖罪兄四男一女婚嫁皆以力任之鄉居建家塾設義冢施棺轉義舉甚多當事皆圖獎之姜之櫟歲貢居鄉多風義母老不仕撫孤姪有恩誼

程學孔汾陽人戊辰進士父商於蘇一夕夢父病立趣裝往省至則父病已殆醫藥顙禱迄無效喪歸哀毀致疾卒於道魏國正幼孤事母得歡心奉兄若嚴師甫冠領鄉薦又十年成進士文章博推尤工於詩以療卒士林惜之

郭建瑄汾陽人與弟建琦以孝友稱父疾臥牀三年躬侍不

頃刻離喪葬一哀於禮母病目醫藥無效瑄方外出琦憂禱宿壇次夢有告者曰舌舐可愈試之甚驗而瑄方感夢治裝歸計其時卽弟夢告者之夕也

郭大機平遙人與從弟大址並諸生少友愛長益雍睦家同爨已歷六世食指五十餘人雖婦孺未嘗有睚眦嫌乾隆中學使屢旌其門子興讓由甲戌進士仕安平知縣有循聲父憂歸未終喪以毀致疾卒

安之瑄平遙人郡文學事親能伺意旨承色笑父病痿扶持搔抑歷二年至積勞嘔血不少懈及居喪哀毀盡禮孺慕終身縣有大役必竭力程其事當事數匾旌其門

梁祖益平遙歲貢母病痿三年不起飲食藥餌雖有婢媼未嘗假手雍正七年所居長壽村遭水出粟濟衆二百餘石又

上卷之二 孝友金三  
焚道券千餘金邑宰雷匾旌其廬

劉璠平遙武舉因父疾遂精醫學赴京謁選聞母病卽馳歸  
母好施委曲將順以求悅母心兄珏無出繼以已子事寡嫂  
甚謹鄉人稱盛德焉

梁州尹平遙人性純實樸訥父病篤割股煎藥以進病尋愈  
梁州儒事母楊氏盡孝母病割股奉之邑令黃旌其門子孝  
裔亦嘗割身肉和藥以療母疾

二人與靳士龍並依  
舊志列入明此重出

冀晏平遙人以吏目注選事祖母盡孝母侯氏病血盡晏日  
以口吮母腹淤血盡除病遂霍然父先魁歿於閩獨往迎柩  
歸渡江值風濤舟幾覆呼天泣禱竟無恙又諸生裔壯觀監  
生裔法舜及縣人李克溫並以善侍親疾稱孝

安萬里平遙監生孝友性成侍父疾嘗糞以驗安危母病風

痺僭妻侍奉妻稍懈怒欲逐之以母言止妻感悔遂爲孝婦  
至事兄祇敬終身未嘗少忤門以內咸化其行焉同縣趙洪  
玉及弟洪璽並敦孝友時稱三難又有任兆泰者亦以事親  
撫弟見推鄉里

冀魯平遙人武舉君錫子也弱冠奉父命從孟縣王太史珩  
遊太史刮目待之父病召之歸未及家三十里得父凶耗痛  
哭墮馬入門擗踊哀號絕而復甦閱三日竟死每至夜分輒  
大聲呼苦家人與語不應止復呼叔君聘取族子爲立嗣聲  
遂絕遠近駭異以爲眞孝子云

范定學平遙人家素貧爲人執炊母王氏病服藥罔效醫者  
戲云食人肉可愈定學卽取利刀剖股肉烹以進病良已  
孟培烈介休監生有娛親圖十二幅備色養之方一時名流



多有題詠

范光輝介休人授職理問六歲失怙數年祖父亦沒哀號撫  
踊見者幾忘其童子比葬廬墓祖母年耄臥病不能起母亦  
多疾遂絕意仕進性樂施予每有周恤皆以親命將之乾隆  
中以孝行旌

郭淇注介休武生疊事繼母備極色養父沒廬墓三年哭泣  
之哀感動里黨侍祖母待諸昆弟並有聲稱乾隆中旌

張呈繡介休監生七歲喪父哀慟如成人母病思飲蜂房泉  
泉在縣山中往汲遇虎虎熟視弭耳去人以為孝感伯兄染  
狂疾百端療治以慰母心母沒廬墓三年朝夕上食一如事  
生又承母志施藥餌掩骼骸又設二義學以養寒畯云乾隆  
末以孝子旌子燮官蘭州知府

霍愚孝義人內行篤厚居喪盡禮三年之內每食必號泣以祭居鄉多行義雍正八年舉孝廉固辭又武生趙啟運及縣民張世濤並以孝友雍睦爲里黨推重

崔景暉臨縣歲貢賀美章諸生並敦孝友教授生徒一時宗仰

王玉書永甯人自孝行父病危思食桑木耳時值隆冬不可得玉書泣禱於神臥桑樹下忽忽入寐及覺仰見木耳新生态甚鮮取以進父病頓愈鄉人奇其事乾隆中知州李廷祕聞之表其門

李昱甯鄉貢生父沒事繼母撫稚弟誠篤備至乾隆中旌孫懋昌汾陽人六歲喪母其父傭工天津病死懋昌稍長痛父骨不歸尋至津門不知葬所有言父與汾人張姓同事者

歸汾詢之張具言爲津民古萬倉所葬比再至則其地已爲  
大路懋昌守路旁長號數日夜會錢尙書陳羣視學遇之憐  
其孝言於縣官乃啟其地出棺數具懋昌齧臂出血滴諸骨  
最後一骨血濺之輒入慘然曰是吾父也枕骨痛哭縣令蕭  
以聞於上官爲給貲返晉復移柁山西臺司以下皆匾旌焉  
錢復爲詩紀其事又有王錦堂數千里尋父得其柩滴血驗  
骨負以歸葬孝廉李潤生爲作王孝子記

高廷璽汾陽人授職理問居父喪動遵古禮事母壽登大耄  
與兄廷蘭友愛無間又廩生段蟾授徒事親侍疾居喪感及  
閭里時以篤行君子稱之

薛士彥汾陽監生年踰六十猶爲其母親滌穢濁妻子止之  
不聽謂爾曹於我分也我於親亦分也值母怒恒跳躍以爲

之有老萊子風弟妻頗悍終弗與校子姪皆化其行不嚴而肅

王安年汾陽人少孤家貧力田事母至孝光緒丁戌大祲曰不舉火見其母輒慟哭母亡數月後亦死

何允恭汾陽人郡文學父以商起家父歿事繼母孝兩弟皆繼母出性豪侈母復縱之恣其揮霍允恭委曲將順後家日落授徒資脩脯以給邑養父愛無間疇昔中年後妻亡不再娶親操井臼以供母年六十餘勤劬勞瘁以卒友人侯毓楠以詩弔之讀者酸鼻

賈槐原名槐年汾陽人父母客沒於外槐尙少不克歸其櫬及長經商稍積有資輒棄去奔走數千里扶柩還葬人稱賈孝子又魏慶林父死川中貧無耗丐食入蜀負遺骨歸人亦

以孝子呼之

孔先生失其名少業儒試不售矩步規行其以先生稱之妻死不再娶旁無親屬傭工以養其母及叔母道光十二年饑村設賑粥扶母及叔母就食恒恐不足分已粥以足之忍饑爲常卒窮餓以死

張玉樾汾陽人繼母任遇之虐事奉甚謹鄉里稱孝捐資賑饑甚有風義光緒丁戊大祲罄所積以濟村人力不能徧憂思成疾卒

王正寅汾陽增生事親愉色婉容值母病延名醫張喬以疾辭三往請不獲見拱立於門竟日無懈容張感其誠力疾往投藥得愈乃曰事親者不可不知醫也受業於張卒以醫名王元攸汾陽人服賈養親屢致千金體母意半以施給有寡

姊撫數月孤家徒壁立迎歸養之同居三十載姊以完節稱甥亦忘其爲外家也邑人欽之

張合文汾陽人父久臣客死蒼梧合文聞信大慟將往扶柩母以其年幼家貧慰止之合文不可毅然獨往至粵覓得父柩資已竭逆旅欺其幼復抑勒之聲於官乃得行有老叟憐其孝假以金助之歸事母數十年亦以孝聞

郭有楨平遙人幼失怙家酷貧事母必供甘旨族有富人羨其孝謹欲擇爲嗣有楨曰富人所同欲但父沒母寡兄有疾相依爲命不忍離也母疾口侍左右汚穢自除及卒苦塊館粥三年如一日云

郝文明平遙人幼業儒以父命輟讀習賈父疾籲天乞代及沒晝夜悲號淚盡繼以血勺飲不入口母泣慰始稍進飲食

母耳後生癰以口吮之愈

冀士超介休人家貧鰥居賣薪以奉繼母母老且病扶持搔抑無間晨昏或有不懌輒謳歌跳戲以博母歡鄉人目爲真孝子

蘇萬元介休人性至孝父病割股療之妻不能事母出之終身不復娶同治初縣人以孝行公舉官匾旌焉

張洙介休人授職州同道光中以孝子順孫被旌焦丕檢親喪廬墓推產以贍其兄又史連第太學生事兄盡禮

郭涵渭介休人父沒於粵冒險扶柩歸李學侗父客死雲南亦徒步歸其喪又宋金鼇郭桂升並以孝名

杜學詩永甯諸生家貧性至孝年七十餘其母尙在一日學時病危念老母無依伏枕泣祝願盡母年卽死無憾病尋愈

後母沒喪葬如禮踰數日無疾而終

延滿銳永甯人少孤家赤貧有勸之服賈者念母不忍遠離  
傭力於鄰每飯必歸視膳畢然後就食於主終身不娶懼力  
不給將奪母甘旨也

李應福永甯農家子也母早卒父繼娶劉生二子惡應福虐  
遇之衣食不時子子稍長更逐諸外應福乃傭墾於鄰力作  
自給及父老而弟恃愛遊蕩盡耗其產時應福已積貲娶婦  
矣遂歸迎父母並挈弟同爨孝養有加母感焉弟亦改行一  
門和順家日以裕子孫有讀書成名者鄉里稱道不衰

王之綱臨縣人事親盡孝孺慕終身先是父少孤有欲奪祖  
母志者因挾父他出祖母以悲思喪明遂得完節父每念及  
輒泣下之綱承父志常思顯揚卒以文學起家子孫林立有



登賢書捷南宮者世以純孝稱之

高時遇臨縣人屋傾壓父時遇奔救扶父出力不勝身被壓死聞者憐之

秦殿臣臨縣人父客遊不反殿臣尙幼痛父之未獲一覲也見異鄉人必詢之數年迄無耗聞有言在歸化者遂束裝往誓與父俱歸一日於旅邸遇之奉以歸

高秉法臨縣人事母孝母病醫藥罔效聞陝之白雲山著靈異渡河往禱焉山下至廟有石磴三百六十級膝行而上一級一叩首方泣祝間忽風從廟起覺身飄忽莫定風息審視則已至其家母病尋愈人以爲精誠所感

李春生臨縣人父疾劇詣神泣禱割胸前肉和藥餌父疾旋愈鄉黨之言事親者必曰李孝子壽九十七無疾終

馮耀先臨縣人與弟明並以孝聞父疾兄弟侍不離側每食必親進歷十八年不少怠父卒哀毀骨立喪祭盡禮縣令趙以雙孝旌之

王錫珽臨縣廩生事繼母篤孝設教介休因母喪明遂不復出母有女亦雙瞽嫁時贈田六十畝爲匱資以慰母心劉維新與諸生王邁延壽崑並臨縣人以孝行爲鄉里推重又樊柏趙敏皆善事其親

薛五管石樓人家貧傭工養母備極勤懇光緒四年爲母析薪隕崖而死聞者傷之又任還來者性歡侍母疾五年一誠罔懈時稱愚孝

李洪念甯鄉人家貧事父盡孝同治五年獲旌一時旌者有諸生王鴻齡李明德並以孝事繼母稱

王滿魂甯鄉人性愚足跛乞食奉母母不飽已不敢食行乞必遠至別村變跣歸懷以食母非甚風雨不及鄰里之門  
王治甯鄉人與弟沛並以孝聞父年八十餘席臥不安乃作大搖牀兄弟更番搖動以適父體

王更生甯鄉人少喪母剔度爲僧其父客死方山鎮更生旣長病父絕祀力求還俗奔方山訪得父墓負骨歸啟母墳合甕焉踰年方山大水父故葬處衝決爲溝矣人謂天眷孝子  
云以上汾州府

張廷澤州人嘗讓產於弟義行甚多積久人尙能道之同時有王濟中者以冒賊刃捍母病爲鄉里所稱

孔興晉澤州人父卒廬墓三年又張所藹亦以廬墓稱孝張恕徵者由舉人任曲沃教諭父沒長號嘔血築廬墓旁日上

食如生

畢一棟高平人家貧事親克盡孝養日治田山中食必歸視甘旨無缺親故老農然嗜人讀書乃督子振姬日夜誦誦曰能得爾王父歡心吾雖勞無苦矣振姬後以積學聞

牛位坤高平諸生明崇禎癸酉就試太原會流寇起中道亟還翼其父避南山中猝遇賊恐傷父乃委身餌賊賊執之刀及頸者四僅未斷喉血淋漓佯僵臥獲免寇稍戢發憤卒業後父沒哀毀骨立服除遂不復言科舉事生平負義氣於宗黨賑饑恤患破產不惜子兆捷成進士

張多學陽城諸生兄多聞構奇疾狼藉枕席間躬爲扶持臥起湯藥嘗而後進沒後父以思子故忽忽而病多學隨事順體卒賴以安性好學教授鄉里多所成就子于廷順治乙亥

進士同縣喬映伍丙戌翰林歷官贊善事繼母及庶母以孝聞

張鈐沁水人明尙書五典子也幼而端謹少長父偕兄銓胥宦遊祖母在堂克慊厥志弟銓銳鎗幼父遽棄養以育以誨皆獲通籍父兩子蔭胥推以子兄子歲歉傾橐賑濟葺縣城障捍屹立陳文貞廷敬嘗爲之傳

牛魁斗陵川人幼孤奉母克孝家貧不能就師教恒從母續分光授讀卒爲名諸生母病奉侍不離左右先是崇禎間負母避寇寇執其母祈請甚哀賊曰此牛孝子也遂舍之

武毅陵川諸生幼孤偕弱弟與母相依明季亂離間避兵負米養母嘗夜行荒山遇虎水暴至幾溺卒不爲害前後縣令皆嘉獎之

任增建陵川人少喪父順治己丑負母避亂山中途遇兵以身蔽母跪泣曰甯殺我毋驚老母兵義而釋之母病巾裙廁踰親自浣滌數年如一日母登大蠶增建年九十餘乃卒  
張宏烈澤州人父沒依母且二十年母忽思改適泣諫不得觸首大慟自縊而死

張廷諫母早亡育於繼母事之不異所生家貧樵採山中力作歷五十年晚以營販起家事母愈謹遇兩弟無私財又州人劉孝勛廩生王封沂並以孝友推重鄉里

成允升澤州諸生事父先意承志居喪毀瘠成疾卒

秦自福澤州人事親以孝聞父喪廬墓三年州守倫可大表其門曰白雲之廬年八十以壽終

薛元徵高平人父光生病思肉不可得元徵割左臂以進病

尋起縣令白以粟帛獎之

李志巒高平人父客于外病歸醫治不起哀毀踰禮至煩母  
采切責及母死廬墓三年人稱其孝又有高才能文章畢振  
姬嘗誌其墓

田多壽高平人姜逆之亂父生蘭死於兵母史被掠多壽時  
五歲伶仃孤苦比長出訪母康熙九年得之於成都傾家產  
贖歸奉養終老人皆稱之

宋才高平人少孤事母孝嘗依姊夫張某灌園爲生後張老  
病孤苦才爲生養死葬時稱其義又有宋璉者家貧事父能  
先意承志甚得歡心

李東高平人父昌文遊廣南二十年不返東少長日奉母衣  
問廣南所在母子時相對涕泣及冠爲弟婚娶俾奉母而自

徒步南行遇盜太行山爲挺擊幾斃至漢口附舟沈於水遇救免及抵佛山鎮四訪無蹤一日夢見其父遂航海走瓊州遇客言父寓瓊嘗娶妾生女今沒已十三年妾亦適人矣卽求妾所在哭奠父墓爲女弟擇配乃負父骸以歸

李林高平人少喪母事繼母郤盡孝父遠出母感羸疾厯醫不効遂割左股暗投藥中母疾漸起而林股創半年始愈張聯璧張烺並高平諸生事親居喪並著孝聲趙曦亦諸生葬祖母及兩叔均如禮又內閣中書李培甲及姪監生錫銓皆善事親李錫誥培甲子也亦以廬墓稱孝

白畿陽城人五歲而孤事母王氏盡孝由康熙戊辰進士授新貴縣令道遠不克迎養抵任三月卽告歸色養三十年母終年踰六十矣哀毀幾絕服闋而卒著有遯園詩藁



白鳳振陽城人鬻菜事父父年九十色養備至士大夫羣加敬禮云

白如梅陽城人父疾所以身代父沒後十年猶蔬食以冬不禦絲纈有朱長年縣定奇溫之痛公舉篤行長官旌其閭又張煥亦以孝稱於鄉

賈琇沁水諸生事親盡孝兄瑀宦遊積金數千臨終密以付琇琇左右孀孤出前金盡歸之並爲區畫生計訓以義方旣沒家無餘財兄子世傑世英爲經紀其喪子世俊孫汝寅後皆以諸生貢太學韓萬戶甲午拔貢亦以孝友著養親終身不倦

賈世英沁水諸生二歲而孤事孀母得懼心母患胃痛祈天求代哭泣廢食甫七日形骨立人幾不識也母臥牀十二年

跬步不離比沒廬墓三年風雨霑濡瀕死者數終制方歸  
賈榮仁沁水武舉性至孝家貧無以爲養常典婦衣以供甘  
旨婦亦無怨言父暴卒繼不欲生母病彌年日夕扶掖不一  
假人手時榮仁年已六十矣居喪哀毀致疾竟卒又諸生賈  
戴德亦以居喪稱孝

張徵仕沁水歲貢陳文貞廷敬嘗以孝友榜其門又張廷禧  
賈人子敬母愛弟丁際聰事兄盡禮並爲鄉里所稱

張蘭馨沁水人幼孤母尚氏苦節育之事母得歡心母沒泣  
血三年里黨推爲孝子

姚文炳陵川人康熙丙寅拔貢以教習謁選京師聞母病馳  
歸及卒哀毀骨立廬於墓側朝夕哭卒侵風霜以死

劉文岐陵川人明季流賊入境偕兄向岐負父母避深山中

採野物以養調護甚至親老且病藉以無恙人咸異之

甯埏陵川歲貢徐曉以貢任永和訓導武雅廩生並以事親  
居喪孝著鄉閭又縣人閻寶廩生馬掄奇劉堯封牛沖漢諸  
生劉惺及弟忱武忪李煥並克篤孝友又歲貢徐慧廩生和  
姬化劉謙並有純孝名王元郇亦諸生嘗廬墓

原一誠鳳臺人家六世同居一誠生五月而孤叔天相鞠之  
長叔沒爲服斬衰三年事母尤孝母亡哀毀骨立葬後營土  
室居於墓朝夕泣拜上食如生時終制猶不忍離家人均痛  
哭往省強與俱歸知縣陳詩匾旌其門又諸生楊兆熊事孀  
母居喪盡禮彭克已亦諸生父老鰥多疾事之克竭其誠  
張爽鳳臺人授職守備事親素孝母沒痛哭出血以哀毀卒  
知縣沈榮昌匾旌其門

劉豪鳳臺人貧不能娶力作以事繼母得錢必奉甘旨而自或忍饑不令母知也母沒哀毀幾至滅性

李學易鳳臺農家子母病篤割股和藥以進母服而愈官旌其門

王如蘭高平人幼孤母苦節育之及長力作養母日食藜藿而於母甘旨必潔祖父逮兄三世六柩積貲葬之外家乏嗣亦推母意經紀其二喪

楊上通高平人少不爲父母所喜竭力孝敬卒回親意其妻李亦體夫志善事舅姑及居喪哀毀盡禮終身茹素夫婦素多疾又推產讓兄彌形委頓迨年五十精力忽強人爭傳以爲孝感云

王清選少孤事母克孝母侯失明侍養不離左右二十年如

一日母沒喪葬盡禮積勞成疾卒

楊增高平人家赤貧授徒奉親每飯必具甘旨遇窘典質以供雖鶉衣不恤也父沒水漿不入口者三日喪葬守禮祭祀必供所嗜子孫猶承其志弗衰

賈曉陽城諸生事母極孝嘗赴省試中道念母輒還母沒號泣絕而復甦者再廬墓三載其後曉卒方暑三日始斂面如生鼻中玉柱下垂人皆異之

于緝陽城諸生事親色養兼至父疾侍側年餘櫛沐俱廢髮墮不能理縷縷盡落繼母病日至瞽每夕焚香籲禱積歲於遇異人鍼治明如故人以爲孝感所致

衛方士陽城賈人也事母以純孝稱嘗賈豫之西華行至葛中途爲盜劫暝色中臨以白刃刀忽墜地聞人語曰此孝

子也不得傷之盜驚懼竄去已而皆就捕賞無稍失長葛令田詢得其情嘉歎者再遣役護送歸家有古槐幹橫屋上遭火將墜忽大風折落牆外屋得不燬人稱孝感有司上其事獲旌子象權早孤事母亦有孝聲以歲貢終

楊雲龍沁水人傭工奉母乾隆壬寅鄰失火母方臥疾雲龍方傭急歸奮身衝烈焰抱母以出喘息未定屋已燼矣母幸無恙而雲龍焦灼成創歷三月始愈

劉體章沁水人五歲時父外出久絕音耗貸貲走訪歷十餘年始知父客死公安負骨以歸又監生張容愉父服賈二十一年不返容愉徧訪秦豫湖湘間至均州知父已沒又年餘始得厝棺所敢土負歸

劉廣沁水諸生學使李嘗屬旌其孝尙憲庸亦諸生事母竭

誠盡孝子五品乾隆癸未進士官知縣歲貢張宜銓徵士子諸生下雋品際聰子並以孝友嗣其家聲

馮沆陵川人幼喪母事繼母韓如所生母病食飲動作必親手扶持一夜屢起凡三十年無間寒暑承歡之暇默坐鼓琴自娛年踰八十卒焦時雨亦善事繼母家貧傭食河南負米以養縣令匾旌之

武任陵川諸生侍父疾衣不解帶者經月居喪水漿不入於口寢處苦塊致傷肩肘間尺許漸潰成瘡嗜學遇所未見書典質以購年七十手不釋卷嘗曰儒者立志當以古今第一流人自期學者謚文孝先生所著有遺斑集

魏振卿陵川人年未冠遭親喪廬墓三年成推至孝

趙克敬陵川諸生與從兄同居五十年未嘗稍忤兄病親奉

湯藥不離枕席撫子姪一體四世合爨敦睦異常鄉居設義塾村人子弟肄業成名者先後及四十人

姚彭陵川人家赤貧擔負爲業事寡母盡孝兄死撫其孤甫恩義甚至嘗向母泣曰吾子有失尙可有子兄子宗嗣所關何可泛視也教養歷三十年卒克成名邑令陳圖獎之武心楚陵川諸生事親以孝聞父歿雲南萬里奔尋備嘗艱苦卒負骸歸獲旌

王如旦和添壽並陵川諸生事親居喪俱有禮則又吏員趙藩諸生王繹及縣人姚之鼎武元勳即彪武心廣並以孝友稱經歷楊鳳事母亦以孝聞

何繼蘇鳳臺人親喪廬墓嘉慶中以孝行公舉

趙廣宗鳳臺人父紹武工詩遊粵東客死廣宗年十歲聞訃



卽欲奔赴祖母憐其幼阻之及祖母與母氏相繼沒廣宗盡貨田產往尋父骸至漢口資竭藉賣卜以行抵粵得父骸於廣州義冢負歸以葬卽於墓旁築屋獨居三年撫松號泣哀感行路同治中旌同時旌者又有李東陽年十五尋父於蜀不得轉入楚遇之光華縣遂偕歸竭力侍養

張潛鳳臺人事親盡孝親沒敬兄尤至有姊貧迎養於家終身不懈與恩貢葛錫琳縣人李安王經綸並以孝友旌表崔沆鳳臺舉人年四十母病痰醫謂痰苦病心酸病肝沆卽掬母唾嘗之其事繼母尤委婉以博歡心教授鄉里一時學者翕然宗之

閻四海鳳臺農家子肩挑爲業母病痿扶持抑搔盥櫛飲食雖奔忙無少缺母沒悲慟繪像一軸出入戴負飲食必祭皇

黨稱之

孫丕承陽城人少貧力學篤於孝友嗣父綺業卒時大母與母庶祖母庶母皆在堂養藉薄田兼顧本生父母不足佐以舌耕婉請同居皆不應乃引咎自責學益奮旣舉於鄉仍申前說跪雪中繼以泣乃允闢聚二十年色養承歡內外無間道光中有司上其孝行獲旌入祠著四書經典春秋解諸書又白植芸服費起家克敦孝友亦道光中旌韓宗哲陽城諸生性至孝事親色養備至父疾籲天祈代及沒搶地大號一痛而絕

白雍泰陽城諸生生有至性母沒哀痛幾絕兩事繼母及祖母並得歡心嘉慶丙子赴鄉試未終場而父卒歸哀毀異常水漿不入口者累日以八月望爲父忌日終身不復鄉試道

光初舉孝廉方正授六品銜又顧經翰丁卯舉人事兄撫弟  
孝友同推官長治訓導

張升書沁水人父賈山左得顛疾聞之星馳往父迷不知人  
近前輒被撻血流盈面起敬起孝竭誠扶侍歷兩月父少甦  
始知其子至也抱之痛哭遂偕歸又諸生高鍾麟王耿光並  
善侍親疾張竹書道光中舉人兄弟友愛築棣華園同居之  
賈聯錦沁水人傭工於外每食必懷其半歸以遺母主家怪  
其瘦偵知之乃令飽食而別饋母俾無內顧感主誼備倍力  
劉某沁水人失其名母疾急思肉食山村不能猝得乃以鑊  
割臂肉作鮓餽進之母尋愈邑令聞之書所爲詩榜其廬  
李膺又陵川人父載司訓平陽卒扶柩歸喪葬盡禮以孝行  
被旌

杜士俊陵川人性慇直家貧食力其父懷宏客死盧氏徒步  
往求骸骨縣在萬山中方苦無所投驟遇虎駭絕虎竟搖尾  
去山上人異而問之告以故其人愕然曰我李姓昔爲爾父  
夥商爾父死卽我爲殯今遇虎不傷孝所感也士俊大喜求  
指父厝旣啟櫬李又言此間某翰林昔試京兆無資爾父資  
以百金後得官報之不受某今在籍往投之必有濟士俊曰  
吾來時一無所知今得君示殯所已出望外何敢他求且父  
在不受彼報今我求之非父志也遂忍困負骸而歸欲合母  
葬而母厝於崖岸樞夥不辨號泣三日忽崖裂得磚朱書隱  
隱諦視之母墓物也喜而合葬村人咸稱之爲杜孝子

以上  
澤州

王逢泰大同拔貢世讀書以愷義聞幼時父之雲攜其兄出

游獨與母楊居姜瓖之變母死於井逢泰殯母訖徒步數千里訪父兄遇父金陵知兄已死痛家多難悲哽欲絕尋奉父歸里父年八十餘以壽卒逢泰每詣墓輒攀柏哀號沒齒不衰太守葉著孝子傳以風世焉

韓一蘇廣靈人與弟一歐並以孝聞父廷和諸生順治元年闖賊敗歸所過剽掠至南和縛廷和去兄弟奔赴賊營各祈以身代賊挺刃交下一歐立糜爛一蘇亦垂斃氣息裁支綴猶以父爲言賊黨有義之者因釋其父後賊退一蘇復甦知父獲免喜又痛弟之死於賊也則復泣久之漸起事其父以壽終當時謂二人生死殊途純孝一轍

郭昌大同監生事繼母盡孝從弟早沒撫其孤恩誼甚至康熙辛卯歲歉待以舉火者嘗數十家

武嵩齡大同前衛人幼孤隨兄奉母遷畿南年十五母卒扶  
覷歸葬遍覽父塋不得號泣數日掘地見棺時稱誠孝又多  
義行官天津守備卒祀鄉賢樊榮天性孝友父棄一孕妾生  
子于外父沒收養至成立人亟稱之施藥施櫓修橋焚券好  
善不倦云

于懷漢懷仁人事母以孝得旌鄉居多行義康熙甲辰歲饑  
蠲賑千石全活甚衆

魏正心懷仁歲貢事釐嫂撫孤姪曲盡恩誼官沐陽知縣有  
循吏稱年九十卒

蘭朝海廣靈人以孝稱又嘗拾還遺金

吳之琳陽高諸生以孝友旌門姪振宗早夭母老子幼琳爲  
經紀其家二十年無間言嘗拾還遺金人稱其義

曹更新陽高人七世同居有江州陳氏遺風士論多之

戴爾誠大同人父之明以孝義聞爾誠事親居喪竭誠盡禮居鄉尤多風義

孫正忠大同人幼貧傭賃奉母克盡孝養後積資稍裕喜趨人急雍正庚午歲饑日施米以食餓者年踰九十好義彌篤全勦大同人父應寶遠去鄉里勸方髻畝稍長卽辭母求父匍匐數千里徧厯三吳兩越間知父已沒號泣負骸骨歸母郝苦節終身勦竭力奉養宗黨稱孝焉

張光壁大同諸生生十二日而母韓卒繼母鄧不答於其父光壁方九歲在外塾心動趨歸則鄧將投繯矣急抱持一慟幾絕鄧感其誠爲不死後以疾卒父又兩娶事之維謹乾隆五年以孝行旌

王印大同人少孤母痼疾頻年顓天求代延醫千里以療之  
村民有鬻妻償逋者慨然解金贖還子廷彥慷慨有父風  
薛宗堯大同農家子年十二見父力苦輒請代旣長力任耕  
作不以累父儉歲甘旨不缺侍父疾寢食俱廢比沒號慟絕  
而復蘇力疾治喪葬甫畢嘔血而卒

苑扶龍大同人家貧事孀母及祖父母孝養甚篤母沒日夜  
哀號竟成痼疾偃臥數載而卒又蕭威服買養親事繼母撫  
弱弟以孝友稱

王廷弼大同貢生侍母疾五年不懈宗黨稱之乾隆庚辰歲  
歉出資助賑又諸生郭淵亦善事親嘗賑庚午歲饑

陳二大同人隸營伍事父盡孝父卞急小忤意輒鞭朴二長  
跪受責值父病啞藥餌不能下顓天割股肉糜粥進之母疾



復剖臂和藥皆獲痊

康萬倉大同人敦睦孝友父性嚴急萬倉已抱孫遇怒輒撻之流血猶作嬰兒啼孺慕弗衰又朱琦家貧孝母年七十母尙存一堂五世有雍睦風

孫光正大同人推產讓兄又趙敏萬恩榮並以友愛聞

田佳富懷仁人傭販養親父母相繼臥疾左右侍養衣不解帶者五六年旣沒飲食必薦言及輒淚下迎養寡姊撫恤孤姪與弟佳貴尤友愛無間乾隆年以孝旌

劉吉忠懷仁武生母沒勺水不入口父諭之食乃稍進饋粥父年踰七十以壽終吉忠已五十矣孺慕如嬰兒旣葬廬於墓側哀感道路又諸生王保彝事母克孝居喪廬墓郝敬學事孀母能養志推產讓弟由貢官翼城訓導

崔德山陰監生賣藥大同事繼母以孝聞母疾奉湯藥易燥  
淫踰年不倦嘗買妾入門察有淚痕詢之則婦婦鬻身養姑  
者卽折券歸之並倍值厚遺以完其節太守史匾旌之  
陳竹渾源人少孤貧有弟走失萬里外尋覓數載卒遇以歸  
居鄉多風義乾隆中學使德匾旌其閭

孫善守渾源歲貢事母純孝母疾默禱求代中牕廁踰皆躬  
自澣濯時演說故事雜以恢諧博歡心人比之斑衣老萊

朱中和應州人事寡母以孝稱鄉里無間言一日行水溝間  
日已暝迷失道恍惚間有儀從兩薄經過猝不及避喚至與  
前輿中神若世奉帝君者怒甚將施朴責旁一吏捧冊進曰  
此人孝行宜道其罪倏忽不見驚懼而歸後於其處建艾昌  
祠俗名水溝寺址尙存

張玉積應州農也母病痿痺侍養備至時抱負出遊以娛其心幼弟爲母所愛推產予之母年九十餘乃終又張彪亦善事母母有顛疾竭力調護無間晨昏壽臻大耋

鄧開先靈邱諸生事母先意承志居喪柴毀幾滅性父沒時兩弟俱在髫髻教養成立戚黨貧者皆周恤之

陳漢靈邱武舉性至孝母偶中毒多方求治有醫者言非食糞汁不可救難之漢如法瀝汁先自嘗而後跪進母飲之愈又諸生盧生瑞及王作試並孝於母侍疾居喪鄉里羣欽曹德陽高人三事繼母並以孝聞力農有贏以濟親黨之貧者臨沒出借券數十紙焚之

景守德陽高人家貧歲歉撙野蔬雜糠覈食之而父母饑必精潔終身不涉訟庭不與人爭或冒之則敬謝曰恐辱親焉

有司給匾獎勸予粟帛

王鐸天鎮人事父圖先繼母馮氏以孝聞父患痿躬負以出入者數年歲荒遵父志散穀以濟村人與諸弟友愛備至縣令陳嘗旌其門

程應愛天鎮人五世同居治家有法度知縣張坊改其所居爲義門村同縣宋朝恩六世同居張並旌之

路璵大同廩生父疾侍湯藥衣不解帶者累月待弟尤友愛飲食衣服從無私積聞室中有詬諍聲輒引咎自責性好學嘗書博覽多聞見寡交少是二語以自警人以爲名言

郭全大同人由行伍擢乃元總父士衡令雲南定遠全以久遠定省終日怏怏及聞

告休將旋里卽日引退迎於中途有留之者全曰古人一日養不以三公換吾何戀此末弁

哉母吳氏早卒繼母柴性悍曲意承順卒得歡心父預爲析產獨厚以數百金固辭不受亦人所難者

張師孔大同貢生幼孤伯叔遇之少恩母董時飲泣師孔雖在暑毆多方慰藉母爲解顏既授室夫婦事母備極孝養當析箸時獨得瘠產綏遠城有祖遺業久廢伯叔卽以屬之其後生業轉盛師孔仍平分羣從不少私人皆以爲難

郭萬源大同諸生少不爲繼母所容出之外百計餬口從無怨言旣力學入庠授徒自給而母所生子皆以游惰蕩其產饔飧不繼萬源竭脩脯以養之孝友之行鄉閭觀感

仝飛龍廣靈人事繼母至孝母卒廬墓三年

李貴吾渾源人幼失恃事繼母如所生母年衰出入扶持未嘗一日離左右凡母所嗜必竭力以致有古懷橘拾堪風病

則奉湯藥滌穢濁族黨稱孝又楊永順郡文學親疾竭誠侍養妹孀居無依力全其節

王國興渾源人家貧力作養母出傭工他鄉夜必歸省兄早喪事孀嫂撫孤姪曲盡恩誼

羅天緯天鎮歲貢父中歲得狂易之疾竭力調護每疾發具食稍不愜意輒探出口或噉地叱令食天緯匍匐咽無難色伺父出必囊果餌以從遇小兒分甘爲娛盡歡乃已人視父油油然不知爲病也其委曲將順如是者十二年子調元武生事親亦善養志後並以孝旌

黃映天鎮人父錫福嘉慶中以營伍從征滑縣教匪戰死映子身往求父尸艱險備嘗卒負骸以歸事母撫弟極情敬愛晚年營運起家子孫多以文學顯同治中旌一時旌者又有

諸生張繼業侍疾居喪竭誠盡禮增貢安文明孝事繼母推產從兄監生任開誠母丁氏以苦節旌者也事之色養兼盡張凌雲繼業子也事繼母得歡心王時泰居喪以毀致疾嘔血卒

趙應天鎮廩生好學有時譽母傅氏感疾久不愈潛心調治奉湯藥十餘年不少懈弟思早卒其婦守志厚遇之後以節著鄉居建義學恤親族歲歉出粟振饑皆承父志爲之咸豐初舉孝廉方正

吳九齡天鎮人服賈養母兄早卒母以哭子病臥遂患足痿九齡侍之甚謹數年不懈撫兄子振鐸教養兼至後舉於鄉徐旺天鎮人力田起家事母甚孝家同居六世有子五人多隸學官籍年踰八十卒

以上大同府

郭建村右衛人有孝行時有葉成才者違法論斬建父鳳林伯鳳山連坐當死建村曰父生我身願以身代遂斬鳳山子安亦乞代父監者謂鳳山年老一子不許時咸以爲難

賈宗孟右衛人順治丁酉舉於鄉嘗代父兄辨枉父病嘗冀甘悲不自勝人稱其孝後官慈谿知縣以廉惠稱子維城康熙丙子舉人

朱鼎瀆朔州人明奉國將軍父病額天祈代卒竭力治喪葬大風雪哀禱卽止國變後貧甚而奉母殷氏承歡罔間詔賜四品職銜仍賞千金人謂純孝之報

牛奇雄朔州人性至孝時嬉戲博親歡心父病篤爲文禱於神祈損已年延父壽後父卒奇雄年踰六十矣偕妻孫氏事母陳依依膝下與少時嬉戲無異也州守侯嘗旌其門



唐璋朔州人業農粗糲時不飽而事親飲饌必腆盡色養者三十餘年父老病足痿璋肩負而行以娛其意州人稱唐孝子云

周文煥左雲武生母劉寢疾八年煥親侍藥餌易燥溼未嘗倦兄病急至每夕露禱又縣人夏步雲陳有學並以母疾竭誠侍養爲鄉里所稱

尹紹業左雲廩生事母以孝聞兄弟析爨度不能禁則盡推腴產讓之而自奉母以居課徒資脩脯以養里人翕然稱之王憲平魯人道光壬辰副貢天性孝友以弟賓抱沈疴遂習醫精於脈理多所救濟

以上朔平府

韓萬善偏關諸生母楊性頗嚴少有所拂卽加笞扑臥病十餘年萬善朝夕侍奉無少懈比卒嘗慟念曰求母於黃泉不可

得矣督學旌之

梁有慶偏關廩生父疾嘗糞以孝稱

陳玘兆偏關人家貧求娶無姊妹繼母癰臥三載手爲櫛沐負販供養後父病痿孝亦如之

武揚偏關人四世同居食指百計量才授任家無閒言弟名亦能守其傳又有王家賓亦四世同居稱義

郭光先甯武諸生幼喪母事繼母張甚謹張病目盲奉侍十七年不倦父疾籲神請代居喪廬墓側三年

劉紹嘏甯武人少樵薪以養寡母母壽百有四歲以節旌紹嘏家日以裕備極色養賑饑周急義舉甚多皆以母命行之道光中以孝義旌子鋒歲貢鐸舉於鄉餘並諸生

侯芸甯武廩生事親承歡養志有從子十一人產悉均分又

設義學以教鄉里

張鵬舉甯武廩貢父沒廬墓孝事繼母養孀姑成其苦節嘉慶元年舉孝廉方正

馮連甯武人祖虹源賈西域不返父欲往尋未及而卒連承父志徒步至迪化州不獲卜於神西南吉遂踰天山由阿克蘇至葉爾羌值膝行泣詢遇父交指示葬所輿櫬以歸

李暉偏關增生居鄉循謹事親盡禮以孝行獲旌

徐縣嗣五纂諸生事繼母以孝聞居家有禮門庭和順縣人

欽之

以上甯武府

右蒲潞汾澤大朔甯七府屬三百六十五人

又一百九

十四人附見

補遺

張正心臨汾人閩賊執其兄索餽五千金力不及半正心傾囊濟之以脫兄難家遂淡泊絕無怨言

王尙龍字雲從平遙人由恩貢官陝州知州乞養歸事父文俊母白胥得歡心閩賊勒餽受箠楚戒家人不令二親知之生憂怖也後父壽百歲母亦九十二歲

李世振字起之蒲州人以光祿寺署丞家居閩賊追餽火炙鐵烙備毒刑或謂何太自苦慨然曰吾一身已登鬼錄忍復累及諸弟耶時壯其誼

山西通志卷一百四十